



Datë: 28.04.2025
Numër Protokolli: 3080/2025

A.nr.467/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj Demi, kryetare, Malsore Gashi-Bajraktari dhe Eshref Shabani, anëtarë, me Avdyl Bekteshi, në cilësinë e procesmbajtësit, në procedurë sipas ankesës me numër A.nr.467/2025, të datës 13.03.2025, të parashtruar nga ankuesi R.A, kundër organit të punësimit/Komunës së Gjilanit, në çështjen juridike “*kërkesë nga marrëdhënia e punës*”, duke vepruar në pajtim me nenin 6, paragrafin 1, nën paragrafin 1.1, nenin 16, paragrafi 3, dhe nenin 18, paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, më datë 28.04.2025, mori këtë:

V E N D I M

- I. **Refuzohet si e pabazuar** ankesa me numër A.nr.467/2025, e datës 13.03.2025, e parashtruar nga ankuesi R.A
- II. **Mbetet në fuqi** Vendimi me numër protokolli 02-016-18621/25, i datës 07.03.2025, të Kryetarit të Komunës së Gjilanit.

A r s y e t i m

Ankuesi, R.A (në tekstin e mëtejme referuar Ankuesja), më datë 13.03.2025, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër Vendimit me numër protokolli 02-016-18621/25 të datës 07.03.2025, të Kryetarit të Komunës së Gjilanit, lidhur me anulimin e konkursit me Nr. Reference: RN0001503, për pozitën Zyrtar për Shërbim me Qytetarë dhe Aktit të Emërimit Nr. 02/016-136625/24 të datës 31.12.2024.

Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit), vendosi për shqyrtimin e të njëjtës, kështu që për vendosje meritori administroi këto prova: Ankesën me numër protokolli 1675/2025, të datës 13.03.2025, të parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Vendimin me Nr. 02-016-18621/25 të datës 07.03.2025 të Kryetarit të Komunës së Gjilanit; Akt Emërimit me Nr. 02-016-13625/24 të datës 31.12.2024 në emër të ankuesit; Kopjen e ID-së së ankuesit; Përgjigjen në datës 04.04.2025 nga Njësia e Personelit e Komunës së Gjilanit për Sh.M; Kërkesën për kompensim të pagës e parashtruar nga ankuesi për Komunën e Gjilanit; Vendimin A.nr.2110/2024, të datës 30.01.2025 të KPMSHCK-së; Konkursin publik me numër

reference RN00015031, grupi i administrimit të përgjithshëm, pozita Zyrtar për Shërbim me Qytetarë; Njoftimin për zbatimin e vendimit të KPMSHCK-së i datës 07.03.2025 nga Komuna e Gjilanit.

Kolegji për Shqyrtimin dhe Vendosjen e Ankesave pas shqyrtimit të shkresave të lëndës të parashtruar nga palët në procedurë ka konstatuar se janë të pabazuara pretendimet ankimore të ankuesit, **sepse:**

Nga administrimi i shkresave të lëndës rezulton:

-Komuna e Gjilanit, më datë 06.09.2024, ka shpallë konkursin publik me numër reference RN00015031, grupi i administrimit të përgjithshëm, pozita Zyrtar për Shërbim me Qytetarë, klasa Profesional 3, dy (2) vende pune, më afat të aplikimit 07.09.2024 - 06.10.2024.

-Njësia e Burimeve Njerëzore në Komunën e Gjilanit, pas përfundimit të procedurës së pranimit, më datë 22.11.2024, ka publikuar Njoftimin me numër protokolli 02-016-125867/24, lidhur me shpalljen e kandidatit fitues, ashtu që sipas këtij njoftimi si kandidatë fitues për pozitën përkatëse janë shpallur M.M-K më 96 pikë dhe R.A, këtu ankuesi më gjithsej 88 pikë, ndërsa më datë 31.12.2024, ka lëshuar aktet e emërimit për kandidatet fitues.

-kundër aktit përfundimtar lidhur me procedurën me numër të referencës RN00015031, kandidatja A. Sh-H, kishte parashtruar ankesë në Këshillin e Pavarur Mbikëqyrës për Shërbimin Civil të Kosovës, ndërsa, Këshilli me Vendimin A.nr.2110/2024, të datës 30.01.2025, ka aprovuar ankesën e ankueses duke e anuluar në tërësi konkursin me numër të referencës RN00015031, grupi i administrimit të përgjithshëm, pozita Zyrtar për Shërbim me Qytetarë, mbi bazën e konstatimit së procedura në fjalë ishte karakterizuar me shkelje ligjore esenciale, rrejdhimisht kërkesat formale të përgjithshëm të konkursit përkatës, kanë qenë të vendosur në kundërshtim me dispozitat e Rregullores (QRK) Nr.06/2024 për Klasifikimin e Vendeve të Punës në Shërbimin Civil, shkelje këto që në vlerësimin e Këshillit e kanë bërë në tërësi si të paligjshme procedurën e kontestuar.

-Kryetari i Komunës së Gjilanit në zbatim të Vendimit A.nr.2110/2024, të datës 30.01.2025 të Këshillit të Pavarur Mbikëqyrës për Shërbimin Civil të Kosovës, më datë 07.03.2025 ka nxjerr Vendimit me numër protokolli 02-016-18621/25, me të cilin ka bërë anulimin e konkursit me Nr. Referencës: RN0001503 për pozitën Zyrtar për Shërbim me Qytetarë dhe Akt Emërimit e lëshuar për ankuesin Nr. 02/016-136625/24 të datës 31.12.2024.

Ankuesi në ankesën e parashtruar në Këshill kundër Vendimit me numër protokolli 02-016-18621/25 të datës 07.03.2025, të Kryetarit të Komunës së Gjilanit, pretendon së i janë mohuar të drejtat legjitime. Kërkon që edhe pse vendimi i kundërshtuar me ankesë është nxjerr për zbatim të vendimit të Këshillit, të anulohet.

Kolegji i Këshillit në trajtimin e kësaj çështje juridikë administrative thekson faktin e pa kontestuar së Këshilli i Pavarur Mbikëqyrës për Shërbimin Civil të Kosovës bazuar në mandatin kushtetuese të përcaktuar me nenin 102 të Kushtetues së Kosovës është institucion i pavarur që siguron respektimin e rregullave dhe parimeve që rregullojnë shërbimin civil, mandat të cilin e ushtron përmes funksionit të monitorimit dhe shqyrtimit të ankesave, dhe së vendimet e Këshillit në kuptim të nenit 21 paragrafi 1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës janë vendimeve administrative të formës së prerë dhe zbatohen nga zyrtari i nivelit të lartë drejtues. Gjegjësisht, në zbatim të këtij përcaktimi ligjor, Kryetari i Komunës së Gjilanit ka zbatuar Vendimin A.nr.2110/2024, të datës

30.01.2025, të Këshillit të Pavarur Mbiqëqyrës për Shërbimin Civil të Kosovës, ku si pasojë ankuesit i është anuluar edhe Akti i Emërimit i leshur më datë 31.12.2024, lidhur me pozitën Zyrtar për Shërbime më Qytetarë.

Për me tepër, duke u bazuar në nenin 130 paragrafi 1 të Ligjit Nr.05/L-031 për Procedurën e Përgjithshme Administrative, ku përcaktohet se : *Përveçse kur parashikohet ndryshe me ligj, parashtrimi i një ankese pezullon, sipas fuqisë së ligjit, prodhimin e pasojave juridike të aktit administrativ, deri në njoftimin e vendimit që zgjidh ankesën.* Kolegji i Këshillit konstaton se në çdo rast të parashtrimit të ankesës si mjet i rregullt juridik në procedurë administrative, ankesa ka efekt pezullues dhe se akti i kontestuar ende nuk ka karakterin e aktit definitiv (të ekzekutueshëm), pra, mbi këtë bazë të këtij konstatimit, rrjedhë fakti së Komuna e Gjilanit ka qenë e detyruar që fillimisht të pres afatin 30 ditor për parashtrimin e ankesave ndaj akti përfundimtar(Njoftimit me numër protokolli 02-016-125867/24, të datës 22.11.2024) e me pastaj, në rast se nuk ka ankesë kandidatëve fitues t'iu lëshoj aktet e emërimit, e që si pasojë, organi i punësimit në këtë rast Komuna e Gjilanit ka vepruar në kundërshtim me këto dispozita ligjore, në atë mënyrë që ende pa përfunduar afati 30 ditor për ankesa, ka nënshkruar aktet e emërimit më kandidatet fitues.

Andaj, referuar, gjendjes së fakteve si më lartë dhe duke marrë parasysh faktin se anulimi i procedurës së pranimit më numër reference RN00015031 është bërë mbi bazën e Vendimit A.nr.2110/2024 të Këshillit të Pavarur Mbiqëqyrës për Shërbimin Civil të Kosovës, atëherë, mbi bazën e këtyre rrethanave rrjedhë së pretendimet ankimore të ankuesit janë të pabazuara, kështu që, në mbështetje të nenit 18 paragrafi 1 nën paragrafi 1.1 të Ligjit Nr.06/L-048 për Këshillin e Pavarur Mbiqëqyrës për Shërbimin Civil të Kosovës si dhe nenin 132 paragrafi 2 të Ligjit Nr.05/L-031 për Procedurën e Përgjithshme Administrative, Kolegji vendosi si në dispozitiv të këtij vendimi.

Këshillë juridike: *Ky vendim hyn në fuqi ditën e nënshkrimit nga Kryetarja e Kolegjit. Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.*

KËSHILLI I PAVARUR MBIQËQYRËS PËR SHËRBIMIN CIVIL TË KOSOVËS

Lënda: A.nr.467/2025

Avdyl BEKTESHI

Procesmbajtës

Ardita Haxhnikaj DEMI

Kryetare e Kolegjit

Vendimi i dorëzohet:

- Ankuesit R.A;
- Udhëheqësit të Njesisë së Burimeve Njerëzore në Komunën e Gjilanit; dhe
- Arkivit të KPMSHCK- së.